

太上洞淵神呪經卷之九

殺鬼品

梵

道言庚辰壬午之年有大雷鬼一名九昌領八萬小鬼手執赤棒來殺惡人行三十六種病病殺惡人復有變簡鬼三千九萬人行其赤腫病復有八千六十九萬鬼行下痢病復有十二萬赤目鬼行吐痢病復有九千萬鬼行目痛病復有四十九萬鬼行寒熱病病殺惡人當爾之時得法師轉經之處此鬼等自然死盡三天玉女八十萬億人與十方緣女三十九萬人一合來下稽首白太上曰自今以去若有病人官事之家請此法師轉經之地疫鬼故來不去者我等自摺逐之令遠走萬里使生人病瘥官事解了若不去者九天力士斬之不想矣

道言世人多不信道若有一人受經男女笑之道士不恥愚人之笑不名道也道者貴矣大水不久甲申垂近壬午癸未大鳥殺人天遣疫鬼行蒸病殺惡人刀兵交集人民死耳蟲蛇虎狼水火毒蒸惡能殺人人不知之但

自惡心妄說賢人誹謗道士毀謗經書量度聖典此之罪人亦當卒死吐血喉塞身體浮腫失音不語天人誅之不赦之矣道士自勅慎口攝心矣

道言自今壬辰之年必有真君真君不遠道

士信者幸自勤學化人受經仙人來迎耳壬午之年世間疫鬼殺人人民死盡太上懸之遣大真人成造嚴平王進方杜周莊玄唐君等汝往世間化人先世有仙骨之者得見此真人真人悉皆俗中有子孫氏世間之人故太上遣之來矣

道言至壬午年必有大災水高千萬丈道士入山入山者免此災也壬午年三月至九月人民死盡疫鬼三萬七千頭專行殺人人不信之者必當先滅矣行九十種病殺人真君垂出惡人不見天遣疫鬼來誅之蕩除天地更造日月布置星辰改易調神人治法仙人為佐五方萬劫不死無有刀兵地皆七寶衣食自然無有六畜男女悉聖無有惡人之類也

道言自今大水來近人有知者奉受三洞男女信法一心行道之者我當遣三天玉女十萬人來護之道士化人受之化一人奉者天人唱善壞一人心不化者天人誅汝耳汝等先身有仙分故值遇此經此經玄妙上天所重也奉持供養置之家中疫鬼斥去一切惡鬼不敢近人矣

道言自今以去世間若有口舌官事刑獄囚徒疾病危厄生死不別當須急轉此神呪大經經有三萬九億大神神來救人疫鬼自去十方赤兵四天魔王緣女等悉下來助子不令有惡若道士轉經之處疫鬼不去者三天力士斬之不想矣

道言壬午之年以來民多疾病鬼兵交行千萬萬群欲殺惡人若病之時得法師來救者我亦遣善人司命四十九萬億人來斥去疫鬼逐之萬里若不去者斬之不想矣

道言壬午年有赤鳥萬億行蒸病殺惡人惡人不信死之奈何真人更立蕩除天地疫鬼皆來殺人世人若欲求免災患可以九月

十月當建是齋拜謁五帝大會一日二夜申
懺東向九拜南向三拜西向七拜北向五拜
乾坤艮巽四向各一十二拜上方三十二拜
下方一十二拜天人降下書于功名得者玉
曆之中或則東向單禮三十六拜唯在精專
獲福無量至癸未年疫鬼行七十種病殺人
若欲求活家家建修是齋拜謁五帝南向三
十拜疫鬼自去萬里矣

道言甲子甲戌甲申旬年有八十萬赤尾鬼
鬼名多阿一頭三尾身長九尺兩手持水令
人寒執行九十種病病殺惡人道士急化人
立靜舍於水上道傍大會一日奉禮五帝司
命西向三十六拜天人必下書于等之家戶
口得入玉曆不在化次書記天門司命益算
終不橫死矣

道言甲午甲辰之年有黑煞病殺人疫鬼八
十九萬人行喉塞下痢病殺人若道士化人
受三洞符籙正月二月三月水上作大會一
日二夜五時集禮五帝十二神北向二十五
拜自然天人記其名矣

道言甲寅之年有大日鬼長三寸千萬為群
與赤色鳥百萬來下人家殺人人有知者
急自合集齋戒水上一日二夜五時懺謝東
向三十六拜天人必來記于之名疫鬼自然
去之不敢近人道士急化人焉

道言壬午年所以有災者山門欲閉前三後
二是以辛巳壬午癸未必有水災及方伯三
公二千石速宜向善此年定有疫鬼流行殺
除惡人不信者死道士但化愚人天人錄于
至心矣

道言世人不信道法天令疫鬼誅之自今以
去有識之士信用行者天人眇之終不令相
枉智士弘之建立功德慎之矣

道言自壬午年有三十六種草鬼殺人人有
草中取菜食其百草枝根莖葉中有鬼毒毒
名生茹生茹兄弟百萬能行氣病十日一月
日入人四支百節中身當黃赤鬼長三寸七
分山中女鬼名羅翁一妃一女將二十萬女
鬼亦入山林水中伺取人又有一女鬼名姜
女先有無量功德應仙為坐不敬三天大聖

不奉三師故鬼見道士入山心不生善意然
其形甚醜身長一丈面黑目縱通身赤黃形
體是穢人不欲見見者遠走避之不敬三事
故教令受經敬師不得誹謗法師侍養勤心
莫作妬媚與俗人交通不從此者天人責之
令住山中三千九百億劫故由不出道士受
三洞之秘錄太上真要將來之基一時之傾
耳不如學仙萬劫不死矣

道言道士受經得明師三洞具足亦如世之
富人矣何以故大富貴之人田宅廣有奴婢
數千錢財足用天下貧人悉為己作從意所
用無有乏短出則乘肥導從自在乞與布施
一一任懷大富足故也大道法師內外俱通
世間書疏無不解者治病醫藥針灸悉皆明
了行來人間萬民敬愛三洞大經無不備足
世人敬之亦如天王及大富是人矣

道言富貴貧賤俱人耳亦稟一命何有殊異
但自富貴貧賤先身之緣有先世習道來故
中國衣食自然而已復有先身造立功德今
為大富貴流及子孫先世應仙未即并騰今

故大富貴也學仙道士貧而樂道者此先身習學來久不化於人故令人大貧困至死無有財物六畜者先身重罪不作功德不信經道六畜中來或奴婢生口中來耳道士貴人悉天上來也自非先身積善者終不得作道士貴人矣

道言今世多有惡人不信道有受經者愚人笑之笑聲盈路辯謗賢人謂道狂顛入山何為或言妖鬼詐作善行不知一切人不可久保富貴無常不可長守夫少有老老必歸死身中三賊自牽而死不覺世人只知貪惜財物受學妻子寧作罪事不肯受經不求仙道私營自累終日悠悠不如學仙為劫不死及共天人神仙同遊矣

道言壬申年多有疫炁下二十三種病病殺惡人唯有受經之人奉敬三師療治萬病者天人簡之國王信道受於三洞教化人民富爾之時中國帝王國王不知世間萬民招惡惡從下生無有端緒百鬼競來宜使男女道士一心治之吾遣十方大驅將軍三十九億

人助道士驅逐之耳

道言三界之中惡人不信道法是以死入惡鬼中以此男女大小鬼兵無數來殺罪人故耳自今以去有一家二家三家一時病患病厄困者請三洞大法師一日二夜五時轉經行九一之道三五之炁取十方之位方殺鬼鬼王亦不敢當今汝道士吾亦自遣四千萬赤弓大卒三萬九千九州力士來助道士驅除一切大鬼山林邪炁十方鬼賊一切斬之耳大魔王及小王順吾教勅下小鬼令助道士治主人病瘥有多官事悉令解了若不如法魔王威疑等悉斬之不忍矣

道言道士者悉皆天上来耳世人自有卑賤醜陋若心信三洞亦天上来耳善人不必好醜各有因緣端正者思善中來大富者先身有布施貧乏之中來大貴者建造功德禮拜三寶中來道士法師者積學中來故心慕大乘並是先身之基耳非今卒得也道士若志慕山藪不用生官一切斷絕入山修道者此是去仙不遠如此道士遊行世間為人治病魔

王助之

道言天下悠悠不知死日此是行尸之人道士求仙受三洞之要勸人受之若入山中或住人間化一切惡人惡人貪欲不肯受道水來死盡刀兵殺汝與泥同流方悔無益大驅除滅鬼兵縱橫致令天下惡鬼殺人若有道士經行之處為人行道轉經所救之者一切大魔王及小王男女天人悉共來共道士令生人病瘥官事了了萬願從心若有不伏鬼炁來感殺害生人者大魔王運周等各頭破作十六分矣斬之不忍一一如太上口勅律

道言自今方有惡鬼殺人鬼名赤眉烏然等四十八萬眾橫行天下來殺惡人道士女冠來救此主人者小鬼王等速告大魔王令力士助道士化人令病悉解釋萬事了了無他之日吾等上遷千等萬等不負金口若不信者魔王及小鬼王等斬身萬段一一不忍矣太上洞淵神呪經卷之九